

《萬千星輝頒獎典禮2020》
汪明荃致辭

2020年，
可以話過得膽顫心驚。
因為疫情，
全世界進入一個新常態，
各行各業，
無時無刻，隨時停擺，
但係，我地台前幕後，
並冇一日停過落嚟。

為咗唔停擺，
我哋都認真加強吃防疫措施：
有任何新設備，
無論係畀同事全身消毒用嘅、
抑或係為成個錄影廠消毒用嘅，
都會第一時間搵返嚟；
而且仲先後安排過千位台前幕後，
去做不同程度檢測；

至於我哋一班同事，
亦都唔容許自己停落嚟，
因為我哋既行業好特殊：
當大家話要 Work From Home，
我哋就依舊繼續返公司拍劇、
出外景、做 Live Show；

當好多行業為減少見面改為視像會議：
我哋每日就繼續走埋一齊，
拍一家人食飯戲、
圍埋傾偈嘅 Talk Show、
仲有玩到顛嘅 Game Show；

當大家話要保持社交距離：
我哋就依然投入去演口沫橫飛嘅嗌交戲、
埋身肉搏嘅打鬥戲、
甚至親密貼身嘅攞攞錫錫戲；

聽我咁講，
我哋開工好似搵命搏咁樣，
其實...
係架！我的確會戰戰兢兢，
但係我哋對防疫好謹慎，

令我哋喺呢段各行各業近乎癱瘓嘅時間，
可以喺一個安心環境下，
繼續有工開，
能繼續做我熱愛嘅演藝工作。
我感恩，
多謝TVB。

另外，
做電視業嘅我哋，
亦有一個使命，
就係希望喺呢段人人留喺屋企、
面對反覆疫情感到焦慮不安嘅日子，
可以繼續每日無間斷提供最好嘅娛樂，
畀香港人抖抖氣，
為香港人打打氣!

希望公司都會好好珍惜
我哋呢一班
喺咁艱難嘅時間，
依然馴身演出，
依然謹守崗位，
共同進退嘅電視人!

我呢一年都係各位同事嘅 Fans，
雖然我已經好少拍劇，
但係我都感受到你哋嘅搏命，
我向你哋致敬！
當環境好返嘅，
疫情減退之後，
唔知公司可唔可以加少少人工，
鼓勵一下我哋一班同事呢？

今晚，
我哋將會表揚過去一年，
表現優秀嘅台前幕後，
同觀眾一齊見證佢哋努力成果！
各位兄弟姊妹，
今晚，祝大家好運喇!

我宣佈：
《萬千星輝頒獎典禮 2020》，
現·在·開·始!